

HARVARD COLLEGE LIBRARY  
FROM THE  
HARVARD - YENCHING  
INSTITUTE

APR 29 1930

66

~~Ch L 3203.88~~

Ch L 3203 /3142/88

江南通志卷一百五十七

人物志

孝義

一 江蘇二府

江寧府

南北朝梁陶子鏘字海育秣陵人兄尚爲倖臣所怨被繫子鏘公私緣訴流血稽顙兄乃得釋居母喪時與范雲隣雲每聞其哭聲必動容改色欲爲申薦母嗜蓴沒後常以供葬後忽營蓴不得悲慟幾絕遂長斷蓴味

陶季直秣陵人早慧祖愍祖宋廣州刺史嘗以四函銀置前令諸孫各取其一季直時年四歲獨不取曰若有賜當先父伯不應度及諸孫五歲喪母哀若成人聞者



江南通志 卷五十一  
酸感及長好學淡於榮利徵召不起時人號曰聘君仕  
齊爲尙書比部郎累遷給事黃門侍郎素清苦家徒四  
壁歿無以具殯歛著京都記

朱年秣陵人母死廬墓終身有白兔紫芝之異鄉人名  
其里曰孝感至今有朱年隴

江紉字含潔考城人居金陵父病日紉侍疾經年夜夢  
一僧告以飲慧眼水乃可差及覺訪智者法師啟捨牛  
屯里舍爲寺以慧眼爲名心已異之及就勸造泄故井  
井水清冽取以洗眼因此遂差後父沒竟以毀卒

張松建康人弟悌坐罪當死松訴稱後母惟生悌襁長  
不能教誨乞代悌死次弟景亦請死悌亦引分讞止染

武帝以爲孝義特宥之

徐雄秣陵人位奉朝請母終毀瘠俄而兄亡扶杖臨喪  
一慟而絕

唐張常洵句容人父卒廬墓墓側生芝草十二莖從孫公  
挺亦以孝聞

宋包級父爲人殺級年十七與弟綉挾讐雙目瀝血祭父  
讐家訟之官義而直焉

嚴晃溧水人舉進士授教諭時元兵渡江晃負母避之  
道遇兵欲刃其母晃以身蔽爲兵所傷幾斃草廬吳澄  
嘗哀以詩

王景雲字仲慶溧水人學問閎博咸淳間以薦辟授清

流簿與弟景華嘗捐貲周恤貧乏兄弟至老不忍析居  
錢浩翁句容人幼孤事母盡孝有妹虜於北軍母痛念  
不置浩翁遍訪得諸萊州携妹省母時母年八十有三  
喜甚鄰里皆賀又十年母沒浩翁年七十終喪不御酒  
肉不脫巾經

張孝友句容人讀書不仕親沒廬墓六年嘗有五色鳥  
來集墓樹平居以德化人鄉俗一變

伊小一與劉興祖俱溧水人割股被旌

元樊淵字德翁句容人至元中奉母避兵茅山兵至欲殺  
其母淵抱哭求代兵兩釋之母亡終身不離墳墓

王榮句容人五世同居庭無間言歲饑賑貧轉死爲德

鄉里延祐間詔旌其門

王進德字仁甫家金陵富而好施出七萬餘緡構郡學  
講堂置一切禮器又買宅一區割田九百畝創建江東  
書院朝錫以額設官掌其教置義庄以贍族修城隍以  
捍井里

顧童子建康人割股愈母而已死

明周琬江寧人父爲滁州知州洪武時坐事論死琬年十  
六叩闕請代上疑爲人所教命斬之琬顏色自若乃宥  
其父戍邊琬復請曰戍與斬均死耳父死子安用生爲  
願早就戮上怒命縛至市琬色喜上察其誠赦之親署  
屏曰孝子周琬尋授兵科給事中

徐鎮童上元人洪武時旌其孝

魏澤字彥恩溧水人洪武時爲尚書建文時謫海寧尉  
文皇逮方孝孺族黨澤陰脫其幼子宗甫密致于台州  
秀才余學夔孝孺得有後又有陳義者陰庇鐵尚書鉉  
二女脫教坊籍亦義士也

浦阿住沈得安嚴分保三人俱江寧人又邵佛定上元  
人皆永樂時以孝旌

李疑江寧人家貧好周人急金華范景瀆爲部吏隻身  
得疾無肯僦舍者杖而詣疑疑延入汎室居之躬爲煉  
藥煮糜瀆有黃白金四十餘兩願以酬疑疑不受籍藏  
之瀆死出已財殯之聚寶山招其子至按籍還金平陽

耿子廉械逮京師其妻孕將育衆拒不納卧草中  
疑謂婦曰人孰無緩急倘爲風露所侵則母子俱隕令  
婦邀歸產一男踰月辭去宋學士濂爲之傳

陳達六合人舉將才李時勉薦之歷都督同知天順復  
辟于謙棄市故人僚友皆畏避不敢出達感謙忠義獨  
收遺骸殯之得歸葬

王指揮失其名世襲虎賁衛妻死不娶獨與母居同官  
黃某遠謫久無耗妻貧不能存成國朱公儀素愛指揮  
憫其喪耦令納黃婦指揮唯唯而已成國擇日歸之居  
數月聞其寢處各異召訊其故指揮曰曩以主命不敢  
違但與婦同寢其夫歸何以處之况彼失節是某失節

江寧通志 卷之五十一  
也成國曰然則奈何曰不若遣送謫所某家有老奴夫  
婦二人可伴之往成國嘆賞從之

顧暘江寧人正統時旌孝

胡深六合人天順時旌孝

戴睿句容人七世同居成化時旌

鄭濂字師周江寧人嘉靖癸未進士爲行人兩使藩封  
餽遺一無所受授山東道御史按兩浙有能名爲湖廣  
按察使以父憂歸乞致仕養母盡孝母卒濂已老哀毀  
踰禮里人著純孝傳以稱之

沈九思字天啟上元人副使琮子父病九思顛天請以  
身代嘉靖癸酉舉鄉試罹母憂哀毀骨立里中勲貴爲

黃門所持橐千金求九思爲解九思拒其金而陰解之  
未仕卒伯子鳳翔進士爲蕭山令以廉能課最遷給事  
中

徐昱字彥昭江寧人父病革醫告技殫昱旦夕籲天求  
以身代刲臂肉和糜以進父疾瘳鄉人將以聞部使者  
昱曰此一時遑迫之計無復之耳奈何從邑長令干名  
乎後舉宣德七年鄉試爲國子助教

徐遠字文穆上元人友人寄一篋內藏白金奇玩夜失  
火友人已甘灰燼遠往探之尚在於已物不及携獨完  
此篋以歸友

蕭春字秉常居金陵父病痢春祈求備至及疾革臭穢

江寧通志 卷之二十一  
五  
狼籍春泣曰吾父不復生矣兩手據床一吸殆盡悲苦  
氣絕良久乃甦父沒廬墓

徐震字廷威家金陵不侵然諾有兩人皆密以金託震  
授其子兩人遽死其子皆不知父有金也震如數還之  
一無私焉

龍景華字宇春上元人少孤奉母教母病危割股以療  
嘗至江滸捐金拯溺活十六人鄰火爇所居叩禱風返  
火息有司奏旌其門爲孝行

姚澍上元人割股療母疾嘗拾遺金候其主不至盡出  
以周貧乏

史世揆江寧人人貸其父千金貧不能償析產時世揆  
遽焚其券嘗納妾入門悲痛不已詰其故曰父寃繫獄

鬻妾贖罪念母無依耳揆立遣還更厚贈之

何岳字畏齋夜行拾遺金二百鐲不與家人言凌晨携  
至故處有尋金者詢其數目封識皆合遂還之其人欲  
分數金爲謝岳曰拾金而不隱豈利數金者乎

趙時振字少東江寧人舉鄉試以哭母成疾死葬康家  
山有碣曰趙少東先生廬墓處

張諫字孟弼句容人孝事二親由進士筮仕行人司丁  
母憂哀毀骨立廬墓三年芝產墓旁遷河南副使召爲  
順天府尹以忤時貴出守萊州政聲大著召爲太僕少

卿

王馮字杲清父芝瑞任四川學道沒王事藁葬瑞州之梅庵馮家赤貧重繭迎柩時六合潘士奇與芝瑞同官同患難同葬梅庵又有故廣東御史顧之俊與芝瑞交厚瑞沒時之俊爲經紀其喪而身死柩亦停於庵側馮并昇歸葬之

王之藩字南衡江寧人兄某領官鏹采銅耗其貲藩毅然鬻產得千八百金以輸官當事義之任陝西藩幕權稅潼關攝華州篆皆有惠政

黃居中字明立萬曆乙酉舉人教諭上海不受生徒私贄陞南國子監丞轉黃平知州投檄不赴持身介特族人爲南大司馬有營弁以千金請托者居中曰奈何以

此失吾生平麾之去

王漢字元倬江寧人孝友能文章舉崇正丙子鄉試親老不仕賦南陔詩以見志一時名人屬而和之人稱南陔先生

陳敦化秣陵人母老卧病土寇爲亂化獨守母不去寇劈門入執化索賄繫於樹連射之備受楚毒惟以身蔽母未幾所傷竟痊咸謂孝誠所致

周禧句容人拯溺人還遺金

梅洪溧水人少孤事母以甘旨自奉甚約其婦有後言遣之母瞽洪負以行一旦復明人以爲異母卒廬墓三年縣令聞而賢之爲娶妻子矣婦厭其貧去之數歲



子卒洪亦卒邑人收葬城北十里許有監司題曰孝子  
梅洪墓

花犇孝子高淳人不知姓名日負薪以市嘗雪中至學  
宮教諭于鳳見其衣敝肘露謂曰何不以薪價易衣對  
曰小人有母不暇自謀也鳳曰汝有妻乎曰有何以衣  
妻曰新者奉母而易其舊者聊蔽體耳鳳喜其孝贈以  
千錢不受固與之乃曰當爲公供薪鳳堅辭之至夜則  
載而投學舍園中

楊師祿高淳人遇亂兵父被執師祿號泣請代兵異之  
欲留置軍中不從被害妻卞氏年二十守遺腹子以終  
吳翥南高淳人崇正末隨父避亂土賊入門劈父胸翥

南樓上望見急下求代被害妻孫氏守節割股療姑

劉銓江浦人父觀爲御史坐事當辟銓具本擊登聞鼓  
願以身代蒙特宥復觀原職

陳標江浦人年五歲生母李氏爲父所遣改適於浙長  
欲尋求以父老不果父沒詣浙迎母亡已十餘年遍訪  
遺塚啟棺滴血負柩歸葬

吳可箕上元人監生甲申闖賊陷京師可箕具酒食召  
親友言別衆莫測其意已乃製白衣題詩於襟入英靈  
坊關廟闔殿扉自經死同時有孝陵衛董啟明武舉黃  
士彩聞變皆自經

曹臺望江寧諸生寇亂捐千金倡修城垣嘗夜宿淳化

鎮聞鄰人以債迫棄其妻即傾囊贖還之

魏孝楞高淳人親歿廬墓楞歿子亦然勅旌父子雙孝

王之卿應天人崇正時旌孝

胡陽生字復之上元人輕財好義歲暮日袖金數十封

伺途中奔走憂惶者與之問姓名不答崇正十三四年

間歲荐饑疫倡捐賑施醫藥收棄嬰給棺槨所費不貲

寧陽侯陳光裕勢奪陽生祖墓地擊登聞鼓訟諸朝卒

復之孫任輿

姚金玉 張繼宗 馮天孫 陸元龍 陳鑛俱上元

人 倪壽 江元孫 張福緣俱江寧人 史負八

葛至學俱高淳人 黃阿回水軍衛人 徐佛保江陰

衛人俱割股療親疾以孝旌表

楊佐上元人甫成童母病劇剖腹取肝和粥以進母獲

愈後三日佐卒所居隣辟雍祭酒程松溪聞而異之殯

之日令太學生數百人送其喪

千戶劉潮子文縉割股愈潮縉疾子天命亦割股療之

戎憲句容人幼喪母事父哲孝每食必問所欲哲患痢

憲割股以進遂愈叔孀無嗣憲奉養如己親

張一鵬句容人年十二父病劇鵬焚香籲天割股以進

吳方明句容人每旦刺舌血書法華經至千餘卷為母

祈壽從弟方魁亦孝母母病割股愈之

袁文化溧水人父死廬墓九載三十喪偶終身不娶

人贈以詩有三十鰥居敦大義九年廬墓重天葬之句  
丁滌溧水諸生事母孝母歿廬墓哀毀踰禮邑令王弼  
聞狀三過慰之撰丁孝子廬墓記

陳宗堯高淳歲貢新城令與同邑周庖劉一俊施龍庠  
生魏耀溧水傳袞庠生楊振六合毛程江浦王海皆親  
歿廬墓三年

顧夢霖上元人同邑沈昇王萬禴吳淦王頊李仕傑張  
繼宗六人句容徐延雄馬獻圖李長標三人溧水虞欽  
黃棖任超庠生虞周四人高淳鄉貢邢振羽陳希任湯  
之尹九歲童子孔允紀四人六合方顯黃閻王岳毛至  
潔陳應登庠生許忠汪國淙沈希孟八人江浦周思皇

一人俱割股療親疾以孝旌表

汪應乾右衛指揮陳名謨各世俱上元人楊鳳江浦人  
李夢周六合人皆割股療親疾

劉鳳池溧水人 庠生馬純仁六合人俱以流賊入都  
赴水死

蔣凡順德府別駕張愬僕也愬居官勤儉偶墜馬不能  
言凡泣走告太守曰吾主飲順德一口水積貸未償今  
若此行囊請封貯使人知吾主爲清白吏語畢引刀割  
股以進顙天願代少間愬稍甦太守義之爲作傳

增華瀨水劉道開之僕道開補崖州幕偕其弟及二客  
三僕往海邦瘴癘二客二僕相繼死乃遣其弟還而道

開又死獨增華瀕死復生間關萬里扶五柩歸出百金奉主母封識宛然曰此主積俸也襤被蕭然衣不掩胷國朝劉玉佩江寧人割股療父以孝

旌表

朱獻醇原名朝幹句容人順治甲午鄉試第一授射洪知縣在官潔清居家孝友嘗請於當事除邑中龍潭運糧及區頭之困邑人德之乾隆元年崇祀鄉賢

駱維持句容監生施德鄉里康熙丙子秋暴水漂漲維持殮死賑生其事尤著子如驥邑諸生性篤孝歲飢賑粥捐貲修建奎文閣明倫堂事載廟碑

羅必顯字揚庭江寧人事親孝家貧不受人憐嘗夜歸過螺南巷口遇以索債投繯懸而未絕者救甦代償其債孫秉侯有孝行母喪廬墓三年

董志聰江寧人明季籲憲重建預備倉九十三間于賽洪橋寇氛時捐金賑濟贖人子女又有築圩堤造義舟諸事

鄧良材字子霄江寧諸生讀書過目不忘潛心理學動循規矩嚴於辭受非義之干介然弗屑也明亡後絕意進取杜門謝客親故罕覲其面子士傑順治辛丑進士張光字樸生江寧諸生敦信義友人謝願小計偕道卒光撫其孤如己子陳君昱死光爲其女擇配贍其妻終身子景柅庠生景載康熙辛酉乙榜令興安多惠政擢刑曹

黃老人江寧庠生黃清家隸也清卒家貧子弱不能具棺衾老人拮据殯葬之遂傭於他氏所得直悉以供主母饘粥春秋伏臘必市豚蹄絮酒走清墓哭奠盡哀高官蔭上元人性篤孝四歲父病痢不食蔭亦不食母病危藥不下咽蔭以口度藥夜則籲天請代割股進之母愈蔭遂絕粒死時年十六其後十八年母年七十七乃卒 雍正十年 旌表

裴師度字述先上元人竭力養親雖一錢入必均之同產養寡妹撫孤甥有陝客遺金於其室度鑰守數年俟其來還之康熙己未歲禮斥產買穀以賑里人

程煒字闇章上元人性誠樸早喪偶不再娶侍父寢三十年親滌溺器裹衣垢必親浣父年九十歿煒老矣猶孺子泣云

錢士揚江寧人七歲母病臥樓下火起士揚聞之自塾奔歸抱母號泣火遂息母沒廬墓三年有白鳥結巢之異

談禮字慎修江寧人父如玉早卒母張苦節孝養備至孤姪十人撫以恩代弟償逋千餘金立義田以贍族完人之婚脫人於難歲終袖銀于途遇老貧者贈之同里李之曉字君明嘗割股療親散衣糧施藥餌給糟瘞枯鄉里稱其好義

何澍字友筠江寧監生幼孤孝母讓產於兄施德鄉里

年九十八雍正三年 恩給八品冠帶三子皆孝友  
唐仲熊字虞臣江寧諸生父早喪事母孝母歿啜粥三  
年不入私室及葬每朔望必詣墓田展拜卒無子士友  
哀之

孫芳江寧人少孤事母盡孝居方山有虎患與弟必立  
捐貲募力士捕之殆盡又出穀以賑飢全活甚衆時上  
元謝之湘亦勉力爲善

孫大倫上元人幼失怙恃哭泣如成人父遺貲數千金  
悉歸伯兄口不言貧生平尤多善事

馮起龍字雲生句容監生康熙辛亥邑大歉出米千六  
百斛銀九十六兩作粥賑飢邑令刊名木榜以示風勵

蘇州府

〔漢〕顧翱吳人少失父事母至孝母好食雕菰飯常率子女  
躬自採擷家近太湖湖中乃生雕菰無復雜草遂得日  
以爲養郡縣奏表其閭

顧訓之吳郡人東漢時仕太原太守五世同居聚族至  
百口歲時子孫依次行酒三歲以下並自知坐次所居  
旁有橋吳人以百口名之又名試飲橋

臯伯通字奉卿官議郎吳中大姓梁鴻至吳依居廡下  
伯通見其夫婦相莊心異之乃舍之於家鴻卒伯通葬  
之要離墓旁

〔三國〕顧悌字子通吳人雍族子以孝友聞爲偏將軍孫權

末年嫡庶不分悌與朱據共陳禍福言辭切直待妻有禮不數見其面其父向歷四縣令每得父書灑掃設几筵展書其上拜跪而讀之父終水漿不入口者五日以不見父喪畫壁作棺像設神座於下對之哭泣服未闋而卒

〔南北朝〕宋陳遺吳人少爲郡吏母好食鐺底飯遺在役恒帶囊剥焦遺母方聚得數斗適遇孫恩亂帶以自隨時逃者多餓死而遺獨藉以活母晝夜啼哭致瞽遺還入戶再拜號咽母目豁然卽明

陸絳字魏卿吳人閑子閑坐始安王遙光之亂爲徐世標所害臨刑絳抱頸求代不獲乃以身蔽刀行刑者并害之兄厥字韓卿少有風概善屬文父被刑厥坐繫尚方尋有赦恨父不及感慟而卒

張敷字景印吳人邵子生而母歿年數歲問母所在便有思慕之色求母遺物散施已盡惟有一畫扇緘錄之每感思輒開筍流涕宋武帝召見奇之曰千里駒也官祕書郎累遷司徒長史父在吳興亡報以疾篤敷往奔省至吳興成服凡十餘日始進水漿葬畢不進鹽菜毀瘠成疾世父湛每止譬之更感慟絕而復續未期而卒孝武時追贈侍中名所居曰孝張里

梁陸襄字師卿吳人厥第四弟弱冠遭家禍終身疏食布衣不聽音樂昭明太子聞其業行引與游處出爲揚州

從事以父終此官固辭不許聽與府司馬換解居之  
猝患心痛醫方須二升粟漿時冬月日暮求索無所忽  
有老人詣門貨漿量如方劑將酬直忽失之時以襄孝  
感所致尋以母憂去職年已五十毀頓過禮太子憂之  
遣人戒諭大通七年為鄱陽內史時鮮于琮作亂襄率  
人吏破之生獲琮案其黨枉直無濫時有人無橫死之  
歌侯景圍臺城憂憤卒景平追封餘干縣侯

〔陳〕張種字士苗吳人仁恕寡欲識量弘博時人為之語曰  
宋稱敷衍梁則卷充清虛學尚種有其風居母喪年五  
十哀毀過甚迫以凶荒未獲時葬服制雖畢恒若在喪  
時稱其孝

張昭昭弟乾吳人昭字德明乾字元明並有至性父病  
消渴嗜鮮魚昭結網捕魚以供膳父卒兄弟並不衣綿  
不食鹽酢日食一升麥屑粥每感慟必嘔血父服未終  
母陸又卒兄弟毀瘠骨立家貧未得大葬布衣蔬食十  
有餘年陳衡陽王伯信臨郡舉乾孝廉固辭兄弟因毀  
成疾昭失明乾中冷苦癖年未五十並終嗣息俱絕

〔隋〕徐孝穎吳人仕隋為校書郎嘗在園中晝卧見人盜菜  
徐轉身向內恐盜見之丁母憂三年不內宿終冬不御  
綿纊形骸骨立每哭哀聲徹於邑里聞者皆隕涕

〔唐〕陸南金字季孫吳人操履謹飭歷官太子洗馬嘗匿盧  
崇道按捕當誅弟趙璧出認抵罪兄弟交爭趙璧曰母



未葬妹未歸兄能辦之我生無益願請死御史義之上  
聞並免初南金爲鄞令築隄爲湖千頃宋治平中立祠  
湖上之青山

張承休吳郡人以南郊齋郎補充州兵曹丁母憂廬墓  
三年又舉賢良方正遷揚州司錄叅軍

丁公著字平子吳人三歲喪母七歲見隣媪抱子哀感  
不食請於父願絕粒歸道父勉飭就學舉明經高第授  
祕書郎卽辭侍養父亡負土作冢貌力癯憊見者憂其  
死孝上聞詔賜粟帛旌閭官至太常卿清約守道每進  
一官輒憂見顏色四十喪妻終身不畜妾

龔景才字敷禮常熟人五世同居麟德初旌表

宋李鰲吳人幼孤事母孝天聖中母歿倚杖寢苦廬於墓  
側早夜悲慟甘露再降於松柏又以母嘗誦金剛經刺  
血爲書刻於墓下郎中楊備表之

范純祐字天成參政仲淹子十歲爲文章有聲仲淹守  
蘇州聘胡瑗爲學宮師瑗學規良密生徒多不率教仲  
淹令純祐入學齒諸生之末盡行其規諸生皆化之仲  
淹屢將兵關陝純祐與將卒雜處得其才否仲淹任人  
賴以無失仲淹城馬鋪砦虜侵撓其役純祐率兵直據  
其地且戰且築數日而成性至孝未嘗違左右不應科  
第及仲淹以讒罷乃就將作監主簿又爲司行監尋解  
去從仲淹之鄧得疾廢卧十九年而卒曾孫之柔第進

士歷禮刑二部尚書封崑山縣開國子奉親事君一以  
仲淹爲法純祐從兄純誠仲淹義田皆純誠辦理因奏  
爲長洲縣尉俾勑規條以貽永久

陸十七吳江人父病刳心作糜進啖隨愈郡守趙汝歷  
爲建旌孝坊

龔明之字熙仲吳人少逮事祖母李李自言嘗夢神告  
曰與汝七十七及期果病且革明之夜禱於天乞減已  
五齡以益李壽灼香於頂者七聞腦中有爆烈聲不爲  
動詰旦李病良愈又五年乃卒宣和時貢京師迎父母  
往已而母與弟相繼亡去鄉數千里貧無以葬明之  
一錢之直皆折賣之又乞貸於人竟獲歸二喪輓撥高

州文學年逾八十參政錢良臣奏其孝行節誼於朝  
授宣教郎賜緋衣銀魚致仕生平不摘人短不作貌言  
每自謂平日受用惟一誠字撰中吳紀聞三卷子昱字  
立道有學行安貧樂義鄉人師之

張柟字材仲吳人宣和初登第歷官朝散大夫性至孝  
母卒年九十九柟亦七十矣執喪甚至初得郊恩捨子  
子姪族人有喪不能舉者哀而葬之

范正平字子夷吳人僕射純仁子學行甚高紹聖中爲  
開封尉以執法忤蔡京後京當國遂構遺表之獄正平  
當就逮弟正思請代曰是時兄方營窀穸參預筆削者  
正思也正平曰時相意屬我且我居長我不往兄弟將

俱不免不若身任之遂就獄捶楚甚至及事白猶羈管象州遇赦得歸初純仁卒特添恩澤官及中外諸孫久之追奪例外官正平遽納其子官全其姪與甥焉正思字子默學行亦爲士林所推

陳振字震亨崑山人父歿貧無以葬得地圓明村卜者云不利長子振曰使親藏得寧或不利於振二弟尚可主祭遂葬焉後振爲紹興進士以祿不逮養刻木爲親像一飯必祭弟拱亦登端平科

周津崑山人治詞賦端平嘉熙中兩舉待補進士父有疾割股以療或以義諭之津曰父母遺體豈宜毀傷然因所子者還以奉之詎爲過耶又有曹椿年者母病割

股療之事聞詔補承信郎立孝感坊又淳熙八年有榮孝子亦以割股救母建旌孝坊其後有張孝子皆同縣人也

〔元〕陳訓訓弟謙訓字思敬謙字師平吳人訓仕江浙行省照磨爲吏廉嘗以乘馬書畫器物鬻錢屬所知營什一自給所知死其妻操錢還訓訓曰生享其利死餒其孤吾不忍也悉以錢與之及歸貧甚謙力苦周旋以奉其兄謙初師林寬龔璠就場屋試兵卒搜簡無狀歎曰待士如此尚何徼倖得失爲哉卽棄舉子業折節讀書尤善詩賦虞集黃潛張翥皆論薦力辭張士誠兵至吳訓謂謙曰汝無官守宜自爲計謙曰兄在吾何所之俄而

江南通志 卷五十一  
兵入室脅訓使拜不屈遂刃其胸謙以身蔽翼之並遇害門人范文炯求屍得之水中猶兄弟相挽結

趙良箴字順卿常熟人父必鑛爲海州節推歿宋季道路多梗良箴侍母行備經患難卒以柩歸元大德間東土大饑以粟二千石助賑延祐間又助賑四百石都省旌之

曹善誠常熟人至順間獻糧萬石助國用建文學書院祀子游割田二千六百畝給師生廩費黃潛楊剛中有記

吳淳字伯善長洲人兄疾伏枕二十年元季吳中被兵人悉奔潰淳獨侍兄不去有操刃入室者乃負兄走避

復遇亂兵交刺淳以身蔽兄被三十餘創昏仆於地兄竟兵死淳稍蘇遂入秦餘杭山以終

金弘業字修可吳縣人居濱太湖羣盜出沒弘業結民兵保障鄉社方國珍亂其黨剽掠吳中弘業遣孫榮一榮三拒之皆力戰死越月寇又至弘業逐之於黃洋灣殺獲無算一境無恙江浙行省上其功授義兵千戶

陳晉字次翁吳江人元末僞吳竊據父作詩坐謗訕論死晉請以身代之父子爭死有司曰代父者孝存子者慈慈孝之人安肯訕上兩釋之父病死旣葬猶朝夕哭一日喪明

朱良吉常熟人母病且死良吉沐浴禱天剖胷取心肉

一嚮煮粥食母母病愈良吉心痛不可起邑人俞某聞而過之觀良吉胸間創裂五寸氣騰出不能言俞爲納其心以桑白皮線縫合月餘而愈

**明瞿嗣興**字華卿常熟人母嘗夏月患癰穢不可近嗣興燂湯洗滌跪牀下執扇驅蚊磨穢剔腐晝夜不少休母又嘗患積氣不食剖股作羹進之疾遂愈母思食芟時芟始花求諸市不得嗣興解衣入水忽得三芟人稱孝感所致

**宋通**字文傑長洲人爲元萬戶侯嘗施家貲保障一方洪武初舉賢良方正不赴嘗曰吾家世有隱德不敢望富貴吾子孫得爲善人永保詩書之澤足矣吳寬爲之

贊妻沈氏富民萬二女也預知家難妝奩概辭之時稱奇女子

**虞宗濟**字思訓常熟人洪武時父與兄坐法當死乃詣吏自任曰父兄不知也獄具斬東市顏色不變年二十二宋濂有論贊

**徐植**字原芳常熟諸生父掌鄉賦後期將伏法植引爲己罪臨刑賦詩曰父母恩同日月高試將一死報劬勞邑人王廷珪作孝子傳又同邑張翼洪武間弟當遠戍以弟幼恐貽親憂代弟戍貴州

**錢迪**常熟人洪武初其父沂坐法論死迪年十八詣闕請代詔刑迪赦沂沂出乃易名甦字更生後徵詣京師

應詔撰祭元幼主文上喜欲官之以老辭賜杖歸從子  
完感嘆廸孝立祠祀之

莫轅字吳仲吳江人洪武初父繫詔獄將刑轅年十一  
願代父死理官誘脅無異詞遂奏釋其父而繫之後獲  
赦季父侍郎禮有寵於上轅憂之每指同姓一人隸洱  
海衛者曰是吾族也後黨禍一家無免者獨轅嘗以附  
尺籍免兄嫂以家禍病死有遺孤二皆在襁褓轅爲保  
護甚至家被火逼母寢躍入火中抱持以出鬚眉盡黧  
年七十七卒私謚貞孝先生

戴君用長洲人洪武初父福之因監稅失火法當死君  
用身代父刑其妻吳氏泣曰吾夫得子道而死吾忍失  
婦道而生子文禮方襁褓紡績以養守節五十年宣德  
三年旌表

蔣安字仁伯常熟人弟懋洪武中犯法謫戍開平時安  
爲諸生去巾幘詣御史泣曰懋幼弱不任戍且老母所  
鍾愛請以安往御史許之

范廷珍字惟中崑山人洪武中父以事連坐廷珍率其  
弟廷珪詣官陳請願代父死情詞懇切官爲感動得末  
減兄弟俱戍河間廷珍故善醫遂以醫濟河間之人晚  
年學益該博喜吟咏字法歐陽年九十餘猶日作數十  
紙葉盛爲紀其事

顏琇字季璫吳縣人洪武初父戍鳳翔母從行留琇守

邱壘越六年聞母訃卽日奔赴函母骨以歸自陝抵吳  
踰數千里骨函未嘗着地行則負之寢則懸於屋梁渡  
則着之心胸父旣老免歸奉養愈謹必躬滌盥家人  
止之躬滌如故父故不知也父卒日夜號泣水飲不下  
咽者五日竟哭死子昌亦有孝行

都文信字士誠吳縣人其父思賢與徐右之交善思賢  
死妻唐有娠日夜悲泣右之日使人存問且慰之曰若  
生子吾當妻以女已而果生文信右之遂館爲婿洪武  
初右之坐事文信請代行右之曰汝未有子豈可爲人  
死不許旣而右之得還後復以事被逮文信曰今  
已有子可行矣右之仍不許文信潛冒右之名以往竟

死於獄右之感其義卽屏妾侍遂以無子都氏世奉其  
祀

沈伯剛長洲人本孟姓自幼爲沈勝五後勝五坐事當  
誅年且老伯剛願代死勝五不許伯剛固欲代之時年  
方十七臨刑太祖怪其少問故特赦之又朱昱亦長洲  
人父當遠戍老不能行而兄先逃去昱年十六請代往  
有司少之欲追逮其父兄備受笞楚固請代部使者憐  
之改留蘇衛

盛逮字景華吳江人弟以鹽法被捕父憐其少不忍遣  
逮曰弟未有子願就捕因謫戍寧夏衛

吳璋字廷用吳江人幼孤依母陸以居永樂二十一年

江南通志 卷五十一  
三  
詔選天下節婦充內役陸以年例當行宣德元年親王  
出封廣東徙饒州陸皆從行璋棄家奔走二藩間屢求  
見母不允正統十二年復懇於王憐而許之命入宮見  
母母病已革璋徬徨割股作糜以進病少間遂負母出  
至寓三日而卒扶柩歸葬梅里璋年至八十一以子洪  
貴受封時同邑梅衡求得父屍於沔陽錢抱璠吮父疽  
而獲愈俱以孝稱

王賓字仲光長洲人博學洽聞於書無所不讀尤精於  
醫然未嘗與富貴人醫里巷貧人及方外士卽往診視  
與之藥絕不望報貌甚寢藥點其面及肘腋爲創鬚髮  
短衣人咸笑之生平不娶未冠父歿終身不冠奉母飯

必親煮羹必親調年七十疾革抱母不捨息半晌復蘇  
呼母連聲始絕葬後魂歸於家曳履拄杖行呼曰娘娘  
舉室皆驚良久乃滅初郡守姚善賢而造之賓掩門語  
曰勿驚吾母踰墻逸出善他日却儀從獨候門下始接  
焉所著有光菴文集

梁棟崑山人父爲館陶主簿將歸留少子鎬贅於邑人  
其母嚙臂而別父母卒棟思鎬徒步至館陶已失主家  
所在後隨處求之垂三十年一日在華亭東禪寺會大  
雨有僧袒而決渠臂有嚙痕棟見心動就與語卽鎬也  
抱持大哭携歸友愛終身

徐季昭吳江人永樂中兄昌伯坐事戍遼東乃請兄留



養而以身代行昌伯曰爾年少不更事豈堪遠戍二人  
互爭久之母竟遣季昭行後十餘年季昭還母尚無恙  
鄉人扁其堂曰孝義

徐真字宗正吳江人靖難兵起避亂與母相失去家訪  
之立誓曰不得母不生還後數年渡淮得之奉以歸  
杜瓊字用嘉吳縣人生一月而孤母顧育而教之長從  
陳繼學爲文必本於理詩古雅有風致間寫山水秀潤  
可觀性至孝痛父早亡從母問其容儀往往形諸夢寐  
母疾刲股以療有司將上其孝瓊曰此豈得已耶惟念  
母節采白耳正統四年知府况鍾疏聞被旌宣正間有  
司薦瓊孝廉辭不就年七十九卒遠近會葬者千餘人

私謚曰淵孝五世孫詩字與言嘉靖己酉舉人歷官貴  
寧道叅議定烏撒烏蒙爭地界事

王鑑字與修崑山人舉天順壬午鄉試其學邃於尚書  
謂二帝三王之道在此大書忠孝二字於壁間成化辛  
未上春官卒遺子漳書曰而祖以千金付我汝仲父二  
孤尚幼我緘而藏之某柱下書到卽付孤去無他囑勉  
思壁上二大字而已漳得書發柱不開緘而與之時稱  
其父子雙孝

張曉初吳縣人以無子娶良家女見其舉止端凝詢知  
父爲廣文喪不能歸售女以備行李曉初卽返之已發  
矣乃令妻撫之擇婿嫁焉後曉初生子習舉成化進士

顧寬字惟仁吳江人性孝友母喪三年不入私室與弟宏俱八十餘歲不分爨族之貧無依者不能葬者皆必有賑給嘗買地掘得故冢復掩而他擇之曾孫名曾唯嘉靖癸丑進士爲名御史

朱顯字景南長洲人父歿廬墓三年每哭烏鳥聞聲皆下事聞旌爲孝行之門又有陸鏗十歲喪父哀毀如成人兩遇盜負母出哀呼曰母令吾母受驚也盜舍之去鄭熙母孀居四十年熙曲順母意至老如孩穉時母愛季弟子婚娶俱先己子

吳中英長洲人父客燕死僕竊金逃中英遺腹生未識父長尋父櫬三往不得最後號慟欲絕誓不得父棺不還有德州僧指示之題識宛然奉歸葬焉同邑杜遵家貧傭力養親父母相繼歿手自穿窆負土以葬鄉人繪圖傳之

顧淳長洲人年弱冠父患痛風不可忍呼淳與訣欲自裁淳禱於天剪髮際肉投藥以進痛立愈同里顧愛石幼值母病夜半赴神廟哀籲剗右臂肉母愈父病剗左臂肉亦如之

鄧汝南長洲人力貧養母妻以語言觸母遣之終身不娶母病剗臂肉旣歿肖像事之如生存

金孝子失名長洲人居甫里父未疾不能行有所詣卽負之家火災倉皇中婦已負翁出孝子不知冒烈焰

焚死

孫雲字從龍崑山人父客死雲徒步萬里得父骨於昭平堡函以歸將渡江旋風忽起恍有物奪其所函骨擲之江雲躍入江中行里許攫得之卒抱函歸後登嘉靖己丑進士官員外郎

譚照字儒溪常熟人增例太學生與弟太學生曉字鏡川三世同居嘉靖三十一年島倭入寇時邑皆土垣知縣王鈇議築城費無所出照慨然倡義捐貲四萬餘金親身督率晝夜併力不五月而城工告竣甫三日倭猝至民憑堅城保守邑以無虞邑又連遭水旱照散米賑饑全活無算又自東門至崑山界脩築岸塍十萬餘丈

建石橋十八座以便往來撫按題請表揚時曉已卒照念祖父以來三世未分所捐之金與弟共之因推功於弟曉得建專祠隆慶元年照卒撫按又核其事行具題備主入曉祠一體致祭錢謙益撰祠記

任環家卒名氏不傳嘉靖時倭寇薄蘇環以同鄉奉檄督鄉兵禦之兵市人子遇寇先遁環獨身射寇寇持長刀突至家卒見勢急扶環上馬寇刃及馬尾家卒直前手搏寇連中數刃死環得脫後竟成勦寇功又有鄉農二人方鋤田爲寇所獲使導往富家二人故引之官軍處大呼殺倭倭殺之

陸懋字邦美崑山人有姊父鍾愛也爲倭所獲將被害

懋突城而下跪請代姊死以全父志賊感動釋之令懋  
擔懋睨其姊去遠提擔撲賊賊追之田間被害旣死尸  
不可辨兄愚哭之哀瞑目閃閃動與頸領合得藁葬城

西

歸鉞字汝威崑山人早喪母父更娶後妻輒杖鉞每炊  
將熟逐之出戶終日不得食比歸又復杖之父死母獨  
與其子居鉞擯不得見因販鹽市中時私其弟問母起  
居致甘鮮焉歲大祲母不能自活鉞往涕泣奉迎母慚  
終感其誠懇從之鉞旣老且死終不言後母事也鉞族  
子繡字華伯販鹽養母與弟綿綿友愛無間繡妻朱每  
製衣必三日二叔無室豈可獨使君被完潔耶後叔妻

亡有遺孤撫之如己子歸有光作歸氏二孝子傳

林德常熟人父爲倭所殺訶知讎所在委身從之屈意  
善事旣親暱乃具酒食誘倭醉卧取其佩刀斷首以歸  
周伯字懷堂常熟人質直好義嘉靖間倭犯海上令大  
戶築城伯獨任鎮海門一帶寇至伯率家屬拒之獲三  
甲首辛酉大水輸粟千鍾粥餓者櫛溝齒御史旌其門  
曰忠義

沈楠崑山人七歲喪父力耕奉母母感痰疾楠割左乳  
火煨爲末點沸湯進之數進稍息屬盡乳而甦知縣劉  
某旌之以文鄰里贈之以粟楠曰楠須母乳以生今母  
病刲以還母豈異事哉敢以一乳爲名高也力耕如故

每盛暑必以半臂掩之不令人見越十年母病復劇又割右乳進之又愈御史周如斗疏聞被旌

錢之選字舜臣常熟人父坐事繫獄選與父更代繫尋隨父戍遼東籍鐵嶺衛爲諸生中嘉靖庚戌進士累官兵部郎中故事官兵部乃得脫軍籍於是上書訟父冤得昭雪封父如其官遂告終養奉父歸里

歸有貞字養素崑山人父年六十一而生口授以經輒成誦年十八爲人師二十父歿居喪哀毀四舉德行處師席者五十餘年素不禮於長兄長兄死次兄復盡得其腴產有貞知而不言率其庶弟居於宅之西偏族人皆嘆美有光尤亟稱之旣而兄姪輩產蕩盡有貞每賑

卹之歿爲棺殮年九十餘無病而終

秦霑字光甫崑山人父爲俠陷成大獄霑年十七囚服投牒御史杖而逐之哭詣太守太守憐之爲緩其獄後得從末減領嘉靖壬子鄉薦選德化知縣再補寧陵遇疑獄必重持之曰向者父獄起吾仰視堂上人猶虎狼也安知今堂下人不虎狼吾耶

張尚友字益之吳縣人精春秋之學吳中治春秋者皆宗之事父純孝父病革刲左臂肉和糜以進人有欲上其事者怒曰是欲我以死父取名乎狀苟上我必死之錢謙益表其墓

吳士志字伯高常熟人年八歲父母出避倭中道相失

士志歸守其廬日家人終當於此索我父歿痛欲從死  
其大母及其母強之食乃日進粥一盂淚漬枕席重裯  
俱爛二母不知其夜哭也踰小祥目失明耳失聰口失  
音血枯骨立見者悲之冬日曝檐下手其父事狀攬筆  
欲有所更定舌卷口噤索飲不能嚥而卒又有徐明俊  
者亦以孝死鄉人並稱孝子云

沈柱臣字公爾吳縣人受業於王敬臣叅究理學事繼  
母極孝歲饑買粟奉母而已與婦食糠粃不令母知受  
徒入糈悉歸母弟嗜酒善費所需稍緩即橫加意氣亦  
笑承之惟恐傷母心為縣學生六舉行優以貢授滁州  
訓導

張冲字應和長洲人母疾焚香籲天割左臂一臠置湯  
藥以進因以愈嘗服賈燕京途聞父病乃倍道行遇盜  
傷肱盡劫其所賈金然故人所附全未失也故人子來  
視創甚不敢問金冲曰盜去吾金君家金固在也遂悉  
還千金人以為難又仗氣負奇有俠客豪士風皇甫汸  
李攀龍黃姬水徐中行王世貞俱為其誌傳

張世偉字異度吳江人中萬曆壬子鄉試服習其祖基  
之家訓七歲喪母上食號慟塾中見皆為流涕父歿事  
其兄如其父急朋友之難甚於己鄉邦有大利病縉紳  
囁嚅相顧必自世偉發之人有不善相戒曰無使張孝  
廉知死無以為殮倪推官長圩賻之乃發喪

屠嘉賓吳江人少孤祖鞠之及祖病危嘉賓割股和藥以進病遂瘳母以哭夫喪明嘉賓舐其鬢久之豁然人謂孝感萬曆中按臣徐旌獎

顧順升字與登吳縣人爲太學生有文譽父死甫一月母又死家又失火順升負母屍出旋復昇父柩遍體焦爛絕而復甦強起營葬事服闋仍處丙舍萬曆中仕爲兵馬司副屢剖冤獄累擢楚府長史不赴抵里卽廬墓以終其年

陳星樞字拱薇常熟人廣州知府國華子萬曆丁酉舉人知湯陰縣思親告歸終養動息不離左右以純孝聞子煌圖崇正士子副榜授翰林典籍以親老辭徵不赴

人亦稱孝

朱陞宣字德升吳縣人舉萬曆壬子鄉試會試寓京師忽心動馳歸母尋卒以父老遂絕意進取少與周順昌同學順昌被逮時陞宣衰絰往送之周旋甚至父終以哀毀卒巡按祁彪佳舉真孝廉請贈諡勅贈翰林院待詔姚希孟私謚曰孝介

楊大滢字子澄吳縣人南兵部尚書成子少從王敬臣游性廉靜見非義色艷然不可犯事親誠孝兄弟四人析產獨取其薄丁巳戊午間歲饑民死無算收瘞枯骼凡兩年可萬計年逾艾危坐一室誦讀不輟吳人稱端孝先生

沙舜臣字子升吳縣諸生事母惟謹與弟舜年舜民稱  
一門三孝當魏璫矯旨逮周順昌時士民仝集舜臣偕  
諸生王節劉羽儀王景臯殷獻世楊廷樞文震亨等直  
前謂巡撫毛一鷺曰人情如此明公獨不爲青史計乎  
曷據實上聞一鷺斥勿譁官旗遽呵叱激衆怒致有羣  
擊之事後獄具舜臣與王節諸人等並黜

繆天秩字原常吳縣人父疾陰割股以進父竟不起居  
喪哀毀以創鉅遂成瘵疾年僅二十四歲卒後以子國  
維貴贈參政

席允信字順懷常熟人萬曆間築福山城十之一雲和  
塘十之二解磚解銅輓運漕糧每代鄉民償補缺額明

季荒早載粟數千斛分貯城中半價糶以爲賑在其  
施粥成梁建牖諸便民事無不爲舉鄉飲賓

朱祖文字完夫吳縣人幼孤母劉勵節撫之弱冠補諸  
生痛母節未揚終日戚戚周順昌初未識祖文聞而憐  
之白當道得題旌部牒下祖文始知乃感泣無何順昌  
忤璫被逮祖文舍家相隨往來津渡出入禁門時遭邏  
卒幾蹈不測順昌誣賅數千祖文思貸金完之以緩其  
死都門不足走走定興不足走吳橋冒暑單騎間關  
千餘里摺摭稍就而順昌已斃獄中祖文以未得收尸  
有違初心若不可自比於人遂鬱鬱以死彌留之際  
以順昌後人爲念



李文詠崑山諸生性孝父好飲會天寒盡醉而寢火發文詠驚覺倉皇入父寢僕李安奔出額已爛牽文詠告不可入文詠直入不顧以身護父同死火中明旦視之文詠僅存一股其父以覆故猶具體事聞表其閭曰孝子坊

張雲龍崑山人能文章有至性母病割臂和藥以進居母喪哀慟感里閭邑遇災祲能任其役調度周悉惠澤均平有司旌其門曰孝義同里朱應芳割股療父疾又有尤大中以父母病先後割胸股者再有司並旌其門黃守道長洲車塘農人也母病日不治守道舐之匝月而明母又疽發於背毒潰守道跪而吮之咽呵聲暗與

補瀉法合疽遂平由是名傳遠邇萬曆間被旌

周室琳字韞美崑山人祖御史元暉爲里仇所訐逮詔獄室琳連疏伏願青衫草履日拜長安門而哭行道傷心由是臺省交章論赦事得白嘗拾遺金五百雪中停車返諸其人

周廷祚字長生吳江人崇正初入都請其父宗建卹典時郭鞏以宗建之禍實自己發極力彌縫託所知囑廷祚無言當以一第萬金相報廷祚曰父仇卽死不避富貴可餌我耶遂疏劾鞏得擬辟時法司以許顯純田爾耕崔應元先世軍功止擬絞廷祚赴法司堂大叫曰此輩慘斃諸忠尚不擬辟豈爾輩猶貪重賄耶法司悚然

皆正典刑一時稱快

袁扉字雪封長洲人幼孤居祖喪廬墓三年母沒亦如之哭泣兩目幾眚或勸之扉曰與其不及情毋寧過情予惡夫託先王之禮以文涼薄也遺產悉讓諸弟己與婦晨夕不給至摘馬蘭杞菊爲食婦亦無怨言婦死不  
再娶族有五喪未舉者爲營葬焉

朱壽陽吳縣人祖文子少補諸生曾祖以禦倭功應世襲蘇州衛指揮壽陽讓弟壽增曾祖專祠在京口逆奄變易天下祠院乃毀之壽陽泣訴於縣祠復存郡縣重其義贈官產五十畝不受贈金亦弗受崇正壬午有司應詔將以五經博士薦壽陽不就卒於家

劉曙字公旦長洲人崇正癸未進士授南昌知縣  
而金陵失守尋死之先是曙以父病割左股痕三寸許至是其僕覓尸視股痕爲驗云

諸永明字合甫崑山人講性命之學一以劉宗周黃道周爲法游成均時會道周下獄永明身入獄中周旋左右同卧起幾閱月道周貫械對簿皆明扶掖獲解出圍扉名重一時

盧士達字德孚長洲人先代於嘉靖倭亂時捐貲助軍需旌爲義門士達有至性父病癱割股肉療之母失明偕其妻晨夕互舐遂復故居喪慟哭聲徹戶外閭巷咸知爲盧孝子哭聲好施與家日以落卒如故有橫逆不

校子應琦諸生備書養親孝行如其父有司上其行地  
表為父子孝行之門

吳正一字素風常熟人明季旱蝗催科愈急正一子身  
冒死叩閤陳四載奇荒得旨許豆麥搭兌蘇松常鎮湖  
五府帶兌餘米捐十之四

申傳芳字維習吳縣人時行孫內行純潔少遊吳庠承  
祖蔭補尚寶司丞遭父喪躃踊長號竟以毀卒御喪以  
孝聞奉旨旌門

金秋字有秋吳縣人年十四父歿哀毀過禮事母孝養  
備至友愛兩弟析產取瘠遜肥建宗祠賜里黨衍善如  
不及陳繼儒文震孟為立傳  
正十一年  
旌表

國朝周茂蘭字子佩長洲人順昌子順昌被逮茂蘭日夜徒  
行至京口始及順昌麾之返曰汝往俱死茂蘭泣別絕  
而復蘇崇正初誅逆奄茂蘭刺血上疏請誅倪文煥以  
報父仇當事者難之茂蘭復刺舌血再書以進又揭逆  
黨呂純如頌璫原疏文煥純如俱服辜故事贈官不及  
祖父懷宗嘉蘭孝義特錫三代誥命蓋異數也茂蘭遂  
於易湯斌撫吳式廬就見請應賓筵為國人矜式固辭  
年八十二歲而終

劉龍光字夢蕭吳縣人與父母因亂相失道梗不得問  
光日夜啼泣成疾少間徒行至盱江禱於張令公祠宿  
廡下夢神有寄居石滌之語驚而寤不知石滌何所也

旁皇路隅忽遇一尼謂曰石際在閩廣之交今方阻兵由徑路往七日可達亟如其言所過皆險絕無人跡最  
後至白石嶺斗絕萬仞捫嶺而下其地果名石際竟得  
母管於村中相持大慟問父所在已歿歲餘矣匍匐扶  
母及櫬而歸龍光好古學精爾雅蟲魚之義音切箋釋  
皆極其旨

瞿昌文字壽名常熟人式耜孫年十七念其祖遠阻廣  
西欲往省恐父母不聽襆被潛行冒矢石陷重圍瀕死  
乃得達式耜誦退之知汝遠來之句且喜且悲後竟裹  
骨而返其叔元鎬繼往不得達歿於永安

顧廷錡字佩堅長洲人父繩詒知蜀之仁壽縣張獻忠

破成都不屈死廷錡子身入蜀陵谷變易無有知瘞骸  
處者呼號路側閱四寒暑輾轉尋訪始得之扶櫬萬里  
外陟險履危中間瀕死者數次抵里門鬚髮盡白

黃向堅字端木長洲人父孔昭崇正癸酉舉人為大姚  
知縣兵阻不得歸向堅憂泣徒步往尋繭心鰲面徧歷  
滇中至白鹽井得遇二親迎還故里人稱元孝

顏中和吳縣人義士佩韋從孫也順治初父宏仁為怨  
家周昌所殺連控於官不得直中和年甫十三痛其父  
被害日取析薪斧礪之束草為人形書昌姓名其上以  
試斧逾三年中和懷斧告母曰兒將往復父仇母大駭  
止之中和竟往值昌市中陰尾之行昌不知也行稍前

遼自後揮斧中昌首昌方左右顧又斧之會母趣其兄孟和走視比至昌已死兄弟乃號於衆曰願借我詣官至縣庭兄弟爭自承衆從旁分別言之始下中和於獄其明年御史錄囚釋之

顧鰲吳縣人父爲仇家金瑞甫刺脅死鰲時僅二歲稍長詢母得父死狀卽淬一刃挾以出入金亦避之至年十八遇金於胥口金見鰲拔刃來刺驚躍入水鰲亦投水連刺傷額不死金挾貲誣以盜有司訊得實金伏辜韓昉字誦先長洲人砥行慕義強學不厭嘗以家財推與其兄自甘清苦卒時有詩云一莖苦菜生平志數卷殘書汗漫遊以子焚貴受封熊賜履志其墓稱爲篤行

君子云焚見文苑傳

馮勗字方寅長洲人父館閩中勗與祖及母居歲荒乏食勗爲村塾師得升斗奉養與妻采苻以食後父客死阻兵亂弗獲歸勗徒步入京爲諸侯客時徵博學弘詞膺薦得第授檢討卽請假歸入閩尋父櫬未得伏地慟哭有老人哀之指視其處遂扶以歸

蔣德峻字公遜長洲人順治辛丑進士性至孝父病割股療之康熙乙卯歲大饑德峻傾家賑濟全活者數千人月給育嬰堂緡錢爲乳哺費施絮施棺埋齒掩骼每歲無算臨卒以腴田百三十畝爲義莊以贍族以百二十畝助於育嬰堂里人感其義請之有司建祠春秋祀

享兄維城字公表爲人醇樸孝友與德竣撫育孤姪不遺餘力兄子感之字叔助以志弗忘厥德德竣置義田諸善事維城與有力焉

席啟圖字文輿吳縣人父本貞好施予啟圖能繼父志廣父所置義冢義田賑凍餒收棄骸助嫁娶施醫藥學宮歲久傾圮爲修葺復舊觀編格言爲蓄德錄二十卷張文魁長洲人家貧性孝傭工以養遇有肉食則携歸奉親甲申之變奉母避杭遇兵相失追尋二年見母於嚴州王姓家迎歸終養文魁年八十一歲卒陳鵬年守蘇題額曰至性全真

黃農字古處長洲人省曾六世孫居母喪盡哀恐傷父

心每夜卧蒙被泣日以疋弱父授經里中離家數里每晨往省風雨無間父憐其疾止之農乃伺門外館僮出問起居乃去日者謂父年五十二適先一年病甚農患其驗也元旦遍禱神廟願減算以益父年忽一夕驚喜曰神許我矣父果愈後農病篤恐貽父累以膳田易金置枕畔謂妻曰汝善事吾父吾得侍吾母矣父歸含淚執手歿得枕畔金始克殯妻金以苦節聞顧天朗字開一長洲人爲官學教習考授知縣以母老不就選積學好義母病侍湯藥成疾及歿一慟而絕時謂孝死有司上聞立祠

聖祖南巡賜

御書孝靖二字顏之長子汧康熙癸丑進士巡撫河南多善政  
三子溥爲如臯教諭二十餘年士多思之

許德璠字荆生常熟人父國賢力行善明末江陰無錫  
避兵來常邑者國賢計口與之居食時僉大戶解白糧  
往往破產國賢爲公正請於當事得題准官運德璠繼  
其志康熙初叩闕請減蘇松賦額每遭旱潦傾囷賑濟  
貧不舉子者出貲收養邑有育嬰堂自德璠始

金拱辰字修來吳縣人以諸生貢入太學奉母盡色養  
居喪哀毀三年舍外寢杖桐見客泣涕漣漣析產皆取  
其下者又厚撫兄之子若孫推之五服親懿婚喪靡不  
周卹疾革檢篋中債券盡焚之

王松齡字御凡常熟人父病臥牀居鄰火起甚迫松齡  
叫天搏顙頰曳風返火滅親終廬墓哀毀盡禮督學張  
泰交題旌

殷鉉常熟人父爲仇陷庾死鉉訴寃於上官數仇人皆  
就獄且合謀殺鉉以滅口於是鉉亦被囚一日雷起獄  
中首犯震死咸謂孝感動天督學魏學誠題旌

王三錫字承寵吳縣人母病顛天求代母卒事父養志  
昆弟早亡撫從子三從孫二如已出雇婢及時遣嫁不  
索直捐腴田百畝倡建普濟堂巡撫藩守給匾旌獎

顧啓賢吳縣人父病醫藥弗效啓賢不令家人知露脯  
於天割臂肉和藥以進父飲之遂愈姊已嫁而夫不事

生產家蕩盡啓賢迎養之終身又爲嫁其女二人有從  
姪幼孤貧不能自存啓賢撫育之及長爲之授室且子  
之貲本以逐什一日吾使之可以畜家口延宗祀也

王迪惠崑山人童年喪父便盡哀毀事母竭力 雍正

元年 旌表

王浦珍崑山人孺慕性生鄉里咸欽其孝雍正元年祀  
鄉賢

歸聖脈長洲人三歲遭父喪號泣如成人七歲就外傳  
常泣師問故荅以不見父爲痛事母曲盡孝敬積脩脯  
葬祖父母及父慈烏繞墓著有菴集皆白雲思親之

意 雍正三年 旌表

沈自顯吳江人九歲遭寇作隨親避難中途遇寇砍仆  
地自顯抱父首泣求寇感動捨去父歿廬墓三年 雍

正三年 旌表

汪宗灝崑山人父病癱跪吮不倦事母盡孝生事葬祭  
悉備禮法 雍正三年 旌表

邱存禮長洲人四歲喪父七歲讀論語至事父母能竭  
其力問師得解歸卽以不得事父向母大慟母愛鮮菌  
存禮日行數里外買歸及母歿刻木肖像朝夕奉祀舉  
喪柩舟由胥江值風作將覆存禮躍入波中扶救風頓

息 雍正四年 旌表

金懋顥吳縣人五歲母歿每念及輒淚下然恐傷父



拂繼母意惟飲泣吞聲明未避土寇山間晝伏夜行遇險峻必負繼母不辭勞父喪聞訃徒步奔歸聞者咸嘆息性慷慨好施親黨待以舉火者不下數百家

顧存儒崑山人七歲喪父躡躄如成人每祭見母哭則亦長號母憐而止之答曰母弗哭乃已既長貧不能葬父適鄰居失火存儒負母出隨偕一傭作昇父棺力不能勝則以身蔽棺向火而哭俄而火滅一日見村婦抱幼子而泣甚哀叩之以夫繫獄將棄子傭身以贖夫罪存儒為傾囊濟之母子得全 雍正四年 旌表

沈萬育字和卿常熟人天性至孝鼎革時負母避兵遇盜捨身衛母盜憐而俱全之母病篤夢神示某醫可愈

傾囊延治果愈建橋梁施棺槨以成母志年九十四

終惟呼父母雍正四年 旌孫淑官編修通三禮著

周禮翼疏年甫二十三而卒

朱之勳長洲人童年事親即知愉色婉容有訓則跪而聽年十一父客秦勸忽寒顫因疑父在外衣單亟製衣寄之後知父果於是日失冬衣家被盜執母以身衛之母得不傷 雍正五年 旌表

朱鳳崑山人以孝友聞曉嫺周卹發於至性 雍正六年 旌表

戴兆箕字傳生常熟人與顧鈇顧鎧吳格相友善三人皆貧困兆箕亦止薄田數十畝鈇無子依壻以老格與

鎧先歿鎧一子不能娶格惟一女流落爲豪家婢兆箕贖歸配鎧子且分以田屋鈇聞其事扶病往謝兆箕視其病將不起謂曰子無憂身後也吾妻死製兩棺者爲子地耳未幾鈇歿殮而葬之里黨咸高其義

楊兆隆字凝厚吳縣人秉性剛正然諾不苟服賈京師往來齊魯燕趙間遇人有患難窘急者必加周卹施惠旣久道路之人皆呼爲楊佛子父歿舉遺產盡讓之弟弟病疽經年醫者曰必服葠觔許乃可起時葠價騰貴兆隆在京聞之卽買一觔寄歸果服之而起自奉儉薄而宗族親黨間皆歲有常給待以舉火者數十家年老家居晨起必肅衣冠誦金剛經以資父母冥福嚴寒酷

暑無間

錢聯珍字公玉吳縣人本姓顧幼繼於從母故從錢姓家服賈旣稍能自立卽迎本生父與繼父母同居兩家尊老優游聚首垂三十年旣而相繼歿附身附棺盡哀盡制各竭其力營葬地使兩塚相望而廬於其間朝夕哀號聞者悽感有子五人治命使長子三子承錢姓而其餘復顧姓以各守宗祀焉 雍正七年 旌表

曹天祿吳江人母雙目瞽日以舌舐之目復明父歿痛絕復蘇廬墓盡禮 雍正八年 旌表

蔡來信吳縣人世居洞庭山幼孤事母孝定省溫清甘旨滫隨必曲體親心母年七十餘卒哀毀如不欲生

葬盡禮祭祀必泣上有三兄長與叔俱早世撫其孤臣  
於成立事次兄極恭順事事欲得其兄之歡心 雍正

八年 旌表

徐杲吳江人年十六被盜劫父去泣請身代不獲負父  
屍歸哭控當事捕得盜伏誅 雍正八年 旌表

張惟馨吳江人年十二父被盜劫冒刃蔽其父盜憐而  
捨之一日父墜於河惟馨躍入急湍抱之俱出父病侍

湯藥終年不解帶及歿哭廬墓側哀動行路 雍正八

年 旌表

李漢長洲人十歲父亡母自經力弱不能解跪捧母足  
哭聲震戶外鄰人排闥解之一日奉母過太湖風作舟

覆漢抱母浮沉中流忽一漁船出救母子俱得無恙以

母苦節未旌終身抱憾將終猶執子手連呼請旌云

程允元字最先常熟人六歲見母病目呼號不食跪母

膝上舐之稱為孝童及長鄰火延及父寢父方疾篤冒

死從烈焰中負父出焦爛而卒

葛光熹常熟人襁褓中即喪父母鄰媪抱而育於葛長

而傭工得一壺一鬻必以奉葛氏父母妻失親歡遂棄

之葛父歿光熹將賣身買棺鄰里義而助其終事又積

傭賃之直葬其先世數棺焉

張友誠常熟人早失父母為人刺舟遍求父母棺骸遇

一老尼其族姑也為言兩棺朽壞久為墳丁棄骨河干

江南通志 卷五十一  
矣友誠哭赴其處躍身入水鄉人援救之得不死乃刻木爲兩親像朝夕祭告如生存

馬維仁常熟人父患背疽危甚醫曰欲知可治與否必嘗惡以驗維仁嘗之味苦醫曰可療但毒已內蝕必吮之而後出維仁吮出膿數升遂痊明年維仁病瘵臨死戒其妻勿哭恐傷親心也

張爾翔字集之常熟人歲遇荒歉輒行糜施構嘗遇人鬻妻者周之以金俾得完聚倡建支川長橋以便行人  
蔣文瀾字葭友吳縣人康熙丁巳舉人歷兵部職方司主事候補按察副使雍正五年偕弟姪文源文涵文滂腹松應鰲等捐貲二萬兩助修水利被

詔褒嘉卽家加光祿寺少卿

孫鼎鍾字采章長洲人天性純孝年十五母患脾疾鼎鍾衣不解帶者八閱月危急中禱於天請減己算以益親壽又割左臂肉和藥進明年母果愈又三年母歿奉父孝養備至父年八十餘疾作氣血俱枯鼎鍾鬻其衣飾房產易葺以供又數月卒鼎鍾廬於墓三年 雍正

十年 旌表

顧濡字方水吳縣諸生幼孤家貧力自節縮以供母甘旨居母喪哀毀幾不欲生三年未嘗見齒亦不離几  
撫其弟幼則勸之學長則授之室老而貧也割產以  
其養凡親族之嫁娶婚喪有不克集事者隨其疎

依助之卒後張雲章為之傳

李鉞字含奇吳江人康熙辛丑進士入翰林少孤事叔父甚謹周旋羣從篤友誼吳孝廉苑客死都門鉞酷貧勉力殯之鳩十金謀歸其喪會患瘵而卒病中侵葶之費皆自借貸而所鳩十金猶封識牀頭從弟成其志長於詩有鄧尉山房集

盛建極長洲人十二而孤居喪哀毀骨立每時祭必泣涕母病痢親為嘗藥滌穢曲體母志篤愛二弟周郵姊家至老不衰 雍正十一年 旌表

劉振時昭文人家貧父母無帷帳振時方數歲為持扇驅蚊終夜不倦父歿哀毀盡禮後以貨殖家隆遂好施

予欲為母祈延年母歿合父喪葬於城東北麓廬墓三年鄉里皆感泣焉 雍正十一年 旌表

徐國楷長洲人 呂樾常熟人 張士仁新陽人 雍

正十二年俱以孝行 旌表

孫豐毅長洲人父仲謙卒慟絕復甦哀思不已冬月母病思食梅實泣林下三晝夜得之人以為孝感云

蘇宗芑常熟諸生課徒養親母張氏疽潰不治籲天求代夢一老人指往興福寺求醫次日果遇老僧畀藥二丸而愈及再往問寺中並無此僧也

趙嗣孝常熟人繼伯父世鐸後鐸沒母陳氏欲殉嗣孝哀懇母乃緩死後出帶示之曰我欲以此終為汝孝故

得以天年終矣母歿負土築墳廬墓五年

李象琛昭文人家貧父病琛甫八齡日鬻菜果得錢以  
供甘旨冬無完衣族兄象翼勸其就學琛以謀養辭值  
鄰家火琛負病父出母亦尋出琛不知也復入烈焰中  
哀號求母者再被火傷卒

以上雍正十三年

旌表

江南通志卷一百五十七終

